

ZOVITE ME, ODAZVAT ĆU VAM SE!

Neka je hvala Allahu, dž.š., Gospodaru svih svjetova. Neka su salavat i selam na Poslanika Muhammeda, s.a.v.s., njegovu časnu porodicu, ashabe i sve sljedbenike, koji svoga Gospodara tiho i skrušeno dozivaju.

Braćo moja u Dini Islamu! Gospodar svjetova je u Kur'anu časnom rekao: "**Zovite Me, odazvat ću vam se!**" (Mu'min, 60.) Tim riječima je Uzvišeni Gospodar izrekao jednu od najvećih naredbi Svojim robovima, a to je da Mu uče dove, te im je istovremeno pružio i jednu od najvećih nada, a to je da će On udovoljiti njihovim dovama. S obzirom da su naše potrebe kod Gospodara velike i brojne te da je naša ovisnost o Gospodaru neupitna i neograničena, nama ne preostaje ništa drugo već da poslušamo naredbu Svoga Gospodara – da mu redovno dlanove svoje pružamo i da ištemo ono što nam duša i srce žele a život traži.

Nema sumnje da je mubarek-vrijeme mjeseca Ramazana odlična prilika za učenje dova, pogotovo onih koje su nam hitno i prijeko potrebne. Da je to tako, svjedoči nam i 186. ajet iz sure El-Bekare, a koji se nalazi na kraju tzv. Ramazanskog ašereta. U njemu Gospodar svjetova poručuje: "**A kada te robovi Moji za Mene upitaju, Ja sam zaista blizu. Odazivam se dovi onih koji Me mole. Zato, neka se oni Mome pozivu odazovu i neka vjeruju u Mene, kako bi bili upućeni.**" Kao što nam to potvrđuju i hadisi Božijeg Poslanika, s.a.v.s., a koji kažu da Uzvišeni Allah ne odbija dovu postača, posebno kada moli pred iftar.

Osim navedenog, postoje i druga vremena kada Uzvišeni Allah Svojim robovima ne odbija dove. A kada se još ta vremena podudare sa ramazanskim, onda je mogućnost ili sigurnost da će Uzvišeni Allah ukabuliti našu dovu još veća. Zamislite dovu u zadnjoj trećini noći u Ramazanu, a to je onaj period kada ustajemo na sehur; dovu poslije namaza, a posebno poslije teravije; dovu petkom uz Ramazan... Pitali su jednog alima da li mu je Uzvišeni Allah ikada podario nešto za što je molio. On je rekao da mu je Uzvišeni Allah podario sve što želio. Upitali su ga o vremenu kada je učio dove, pa je rekao da je to bio period petkom između ikindije i akšama. Kada su ga upitali da li i dalje uči dove petkom, on je rekao: "Ne. Stid me je da išta više tražim. Sve sam dobio što sam tražio."

Naravno, u dovi nema stida. A ako se nekada ne možemo sjetiti šta bismo tražili za sebe, jednostavno tražimo i učimo dove za druge. Prije svega za svoju porodicu, pa onda za rodbinu i prijatelje, a zatim i za ostale muslimane. Ljubomora i zavist vrlo često su prepreka nekim ljudima da uče dove za druge, a da znaju koliki je hajr u tim dovama ne bi prestali da ih uče. Poslanik, s.a.v.s., nas uči da kada učimo dove za druge u njihovom odsustvu pored nas stoji melek koji kaže: "Amin, i tebi." Dakle, ako ne znaš šta bi dovio za sebe, dovi za druge! Dobro njima a dobro i tebi, a to će ti istovremeno i pomoći da izliječiš ljubomoru i zavist ako se kod tebe nalaze.

Poslanik, s.a.v.s., nas u svojim hadisima također podučava nekim riječima, koje našu dovu čine dražom Gospodaru i time bržom na odgovoru. Navest ću vam dva primjera. U prvom primjeru Poslanik, s.a.v.s., savjetuje da prije učenja dove proučimo: deset puta "Subhanallah", deset puta "Elhamdu lillah" i deset puta "Allahu ekber". U drugom primjeru preporučuje da prije učenja dove proučimo tri puta "Ja Hajju ja Kajjumu ja Zel-dželali vel-ikram". Ovo drugo se preporučuje da se uči 40 dana poslije svakog namaza.

A ono što još treba da znamo u vezi sa dovom jeste da mi nekada tražimo nešto što nije dobro za nas, a mi mislimo da jeste. Dragi Allah, iz Svoje milosti prema nama, to nam neće dati. Ali, ta dova neće propasti. Uzvišeni Allah će nam dati ono što jeste dobro za nas ili će nam sačuvati dovu za Sudnji dan. Također treba znati da je jedan od uvjeta za ispravnost dove da se u njoj izrekne zahvala Gospodaru i salavat na Poslanika, s.a.v.s. I, svakako, ono što je za dovu možda i najvažnije jeste ustrajnost. Poslanik, s.a.v.s., je rekao da će Uzvišeni Allah primati dove od Svoga roba sve dok on ne bude odustao i kazao: "Molio sam, ali mi se Gospodar nije odazvao." Dakle, sa dovom treba polahko i saburli! Gospodar svjetova nekada želi da vidi da li nam je baš stalo do toga što tražimo. A nekada ono što tražimo jeste dobro za nas, ali još nije nastupilo vrijeme da se to ispuni. Neke želje Gospodar ispuni kasnije nego što mi to želimo i očekujemo. Ali opet je navrijeme, jer Allah zna a mi ne znamo! Naše je samo da tražimo i da ustrajemo. I da tražimo samo ono što je dobro i za nas i za druge.

Hutbu ćemo završiti riječima, kojima Uzvišeni Allah završava suru El-Furkan: "**Reci: 'Za moga Gospodara ste beznačajni, ako nema dova vaših.'**" Zato braćo moja, učimo dove! Budimo značajni svome Gospodaru!

Molim Dragog Allaha da nam podari lijepo zdravlje, slatku nafaku i veliki bereket. Amin.